



Regd.No.19134/88 <http://www.kbc.org.in> NAI/220/99
No-G-4/Regd.Magazine/KBCThuso/MNP-81

KBC | THUSO

Kum 54 Ihinna

LhaLhalam/September 2017

So461



Christian Education

October Events

YOUTH DAY-01
CHATE NIKHO - 22
PASTOR TOUR EXCHANGE

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



P. BUNGSANG

*Baptist Church Rev. Lamkeng Lhouvum
Pastor, Gambih No 7 in Kot hon na ana neitai*



Head office
opp. Diti College
Imphal



www.kbc.org.in



kbcindiasiredit@gmail.com
mail@kbc.org.in



*Gambih 16 sung a khangthah mi tampi in
Combine Fasting Prayer ana ki mang khom in ahi*

CONTENTS

THUMAKAI HO

1. Editorial/Christain Education	1
2. Education Day /Rev. Onthang Haokip	5
3. Penthahna Dihtah/Rev. Henjalen Dounge	7
4. Pathen ngaisah lam a/Pastor Satminlen Thanggeo	12
5. Mission Column	13
6. Men Column	21
7. Youth Column	22
8. Education Column	24
9. Literature Column	26
11. Report/Hetsah	32-35

EDITORIAL BOARD

<i>Chairman</i>	: Rev. Dr. HawIngam Haokip, President KBC
<i>Editor</i>	: Rev. Ngamjapao Haokip, General Secretary
<i>Joint Editor</i>	: Rev. Henjalen Dounge
<i>Contributing Editors</i>	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
<i>Cir. Manager</i>	: Ms. Lhingjanem Haokip
<i>Design & Layout</i>	: Hemkholen Haokip

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 9612817768 Contact thei.
Circulation to kisai lam Mobile No. 9862633173 bol ding.



Christian Education

Editorial

Thumakai:

Kum 2017, September (Lhalam) damsel'a ihung lut'u toh kilhonna Kuki Baptist Convention Events of Calendar dungjuja tulha thupi chu "Christian Education" ti chu ahin tunin Christian insung tamtah tahsa lam education in iki tet un ikhang tou lheh jengun ahi. Ahin vangset umtah in lhagao lam'a chate ahi nading banga education ipeh tah lou jeh un chate tamtah hinkho semphat thei lou vin hinkho amang gamtao vin pohnat le lainat aum lheh jengin ahi. Minu mipa ten jong chate achi diu le athep diu dei nan education hoitah ipeovin, ahinlah christian hinkho adia akhoh pen lhagao lam'a education ipeh tah lou jeh un achi uva athep lheh jeng vangun tunin insung khosung houbung sung kipana asoh doh jou deh tapon ahi. Chihna thepna hoina jong hinkho sunga hin athupi lheh jeng nai, hijong le hiche sanga mantam jole thupi jo Christian education (Pathen thua kihilna) ilhah sam phat un insung jengin jong kip-

ana ahi nading bangin aum jou tapoi. Tunin Christian hinkho adia athupi pen Christian education hi Pathen lekhabu Theng in ichan'a nei dinga khohsah na anei ham them khat veo hite.

Text Psalm 78:4&5, "Acha anaote henga eihon seipeh louva ikoi lou ding u ahi, ahung ding khang mite henga isei peh joh ding u ahi bouve; Pakai thilbol loup i tah le, athahat na, atohdohsa thil kidang tah aboldoh chu. Jacob khangin kitepna aphutdoh in Israel lah a dan-thu atungdoh tai; hiche danthu chu ipateu ana peh ahin, achateu ahil ding uva ana peh ahiye".

1. Pathen phat nale athilpha bol suhmil lou ding ahi V4

Psalm 78 hi Asaph labol ahin Israel chate jouse jah ding le anit soh kei ding uva thupeh ana nei ahi. Ajeh chu Pathenin thil kidang tah le thil loup i tah Israel chate chung a ana bol ahin Pathen phat nale athil pha bol amiten sumil louva nitin hinkhoa achin uva ahet jing diu hi hiche Psalm jihpa lungtup ahi. Hiche Psalm jih pa lungboi nachu ipi ham iti le apu apa teo vin Pathen phat nale adinguva athil pha bol sumil'a lungtah pum'a Pathen douna jenga hinkho aman bang uva hinkho aman lou diu hi asei peh nom pentah chu ahi. Egypt ma Israel chate soh a genthei athoh uva panpi ngaiya aum pet uva Pathen akon'a panpina achan nung jeng uva jong Pathen asuhmil uva chonset najenga hinkho aman u avelin atah lang kit nin ahi. Tuisan pi jong apal galkai piuv in, Zanteng meikonga apuiyin sunle meilom'a apui in, Songpi akon'in adon diuv in tui apen, imacha tonglou le thamlou

*ahi jeng vangun aneh diuvin manna aphot
phatchan ape jingin, ahi vangin Pathen dou
nale chonset nan hinkho amang jing jengun
ahi. Pathen lunghan'a achung uva achuh phat
nin mi tampin ahin'a achan un Pathen in atep
peh u gam chu lo jou louvin ana um taovin ahi.
Hiche Psalm jih pan Israel chate jouse het dinga
adei pen tah chu ipi ham itile tukhang miten
vang malai apu le apa teo to bang louva Pathen
phat nale athil kidang bol ho ageldoh jing uva
Pathen thangvah na hinkho aman jing diu hi
adei ahi. Ajeh chu Pathen phat nale akitah nahi
sumil'a chonset jenga akiman chah kit leo ama
ho khang jenga jong Pathen lunghan chu hung
lhung kit jeng thei ahi.*

2. Pathen Danthu hoitah a nit jing ding ahi V5
Pathenin Israel chaten athupeh ajui uva anit jing
diuvin danthu jong ana pen ahi. Hiche dan thu
hung kipe chu achate jouse ahil jing uva anit
jing diu hitia chu hung kihil son jing dingu ahi.
Pathen in danthu apeh u akhoh sah dan chu hiti
hin asej jin ahi. " nanghon aboncha hi nachate
nahil uva insunga natou thim pet hihen lang,
lampi najot pet hihen, nalup pet jeng hita hen-
lang chule nahung thodoh teng hijongle, thupeh
hijat pi hi nasei peh peh jeng ding dol ahi" (Deu-
teronomy 11: 19). Pathenin danthu apeh hi kitup
tah le hoitah a ajui diuvin aseipeh in hiche keo
hilouvin achate jouse jong ahil soh kei uva ajui
chah diuvin thupeh lentah apen ahi. Ajeh chu
Pathen in apeh dan thu hi juilouva aum teng leu
amaho jong amah thah ji un chonset nan alha
jiuvin Pathen lunghan'a achung'uva alhung
jin ahi. Pathen'a kon'a avamang lou nadiuva
lampi dihpén le phapen chu Pathenin apeh u
danthu hoitah a ajui u chu ama ho dia Pathen to
kiloikhom na phapen ahi. Pathen thupeh angai

teng phatthei na achang jiuvin, Pathen thupeh angai louteng leu sapset achangun genthei tah in mikhut noiya soh in ana um jing uve. Apute apa teo lungtah jeh le git lou jeh in Pathen lunghan'a ana um jeng tajong le achateo in Pathen danthu hoitah a ajuu uva Pathen tahsan na a lamjot pum'a hinkho aman khom diu hi hiche Psalm jih pa doile tup ahi jeh a tilkhouna le thupeh na ana nei ahi.

Achainan: Pathen lunghan Israel chate chungu alhun kit lou nadingin Pathen phat nale athil kidang bolho agel doh jinguva; Pathenin apeh u danthu jong hoitah ajuu cheh diuvin kihilna aneyun ahi. Amaho seh hita louva achate jouse jong ahil uva ajuu cheh ding ngai ahi. Chuteng lebou phatthei na chang bep diu ahi bouvin ahi. Tunin Christian insung tamtah Pathen thua kipui nale kitil khouna alhasam l'leh tai. Pathen phatna ho geldoh lou le kisei peh lou Christian insung chu bouina lentah lhung ding ahi. Pathen mingailut le achapa Jesu Christa jalla tonsot hin'a nanei jeh chun Pathen thangvah jingin lang na insungmi le nachate jouse seipeh jingin. Chule Pathen le-khabu theng a thu kisei jouse anit'uva ajuu jing thei nadiuvin hoitah in kikhon khah jing u hite. Tahsa lama education sang tah tah nei jong leo hen Pathen cha khat hina'a Pathen thua chon lou le kikhon khah lou ihi leo ichih ithep nao chu panna bei hithou thou ding ahi. Hihjeh hin Christian education hi eiho din apoimo l'leh jenge. Pathen thua hung kikhon khah a Pathen thupeh jui jing minu, mipa le khang-dong houbung sunga aum jing thei nadingin Pathenin phatthei eiboh taohen!

Education day

thupi achomlamtah'a hilchetna



SERMON

Education hi Latin paova 'educatio' kiti a kon, English a kiledoh ahin, eipaova le din "ahe ho'n ahelou ho hil or jilsahna" tia het thei ahi.

THUBUL

Alhangpia seidin Themjilna hi mihem khat hinkho chedan in dan 6 in akikhen in ahi. Vetsahna in Preschool, Kindergarten, Primary School, Secondary School, College, University or Apprenticeship. Achungchon in Themjilna hi lam ni in akikhen kit'in ahi, hichu Formal chule Informal Education tin akihei. Tukhang a hin "United Nations(UNO)" te gon dungjuijin Government tampi'n "Right to Education" ti Danpi hi achepiuvn ahi. Hiche toh kilhon in Gam tampi'n "Education" hi mijouse a din chule mihem khat kum ichan ham khat aphah geija dia peltheilouva (Compulsory'a) chepi ding atiu ahi. Tulai khanga miching le vannoi pumpia lamkaite hin Illiteracy suhbeina ding hin tohgon jatchomchom aneijun, hitiho lam'a mopohna nei chu UNESCO(United Nations Educational, Scientific and Cultural Organization) ho ahivun ahi.

Hiche hi November 16, 1945 kum'a gam 195 kigomhon ahin phu doh uahin, a Head Quarters u chu Place de Fontenoy, Paris, France ahi.

PRE-HISTORY

Masanglaija chu Thepjilna hi

'seitho'a hung kipeson'(Oral tradition) ahin, hichu "Pre-literacy period" ahilou leh "Jihtho a kijil/kihil masang phat" tin akihen ahi. Phat hungchal dungjui-jin mihemte chihna leh thilbol theina jong ahung khangtouvin "Formal Education" hi 500-1600 AD in ahung kisemdoh pan in ahi. Gam khangtou masa Egypt gamlai lung ah 1607 kum'hin simthei ding lekhabu jong ahinsodoh theitauvin ahi.

BIDOI

O.T. lam ivet leh jilna hi Insunga kipan ahi. Mipa hon achateu Torah, Sham'ah, chule Psalm ho hi achateu kum 12 ahinphah chanuva Insunga ahiljiu ahi. Hitia akihilnava kon Pathen gin-jedan, chonchanpha, society a hindung dan ho ahinjinlao hi Primary School ahin, mihem le Pathen sah a umtheina chu ahinjidoh u ahitai. Hiche thudol a hin jilna masapen leh aphapen chu Insung hidingdol ahin, mipa le minu chu Oja(Jilkung) masapen leh aphapen hididol ahi. Thu hethei ahung hitengu leh mipi kikhopna Houbung ho a Houhil ho kom'a asoljiu ahi. Hiche phat laija kihilna chu Pathen thu leh tahsa lam damthei le thenna thu ho kihiljiu ahin, akikhopnau chan chu Pathen umna a ageljiu ahi. Tukhang a ivangphat nau chu lekha lam thepna ineicheh tauvin, Bible labu kivet theijin Pathen lung-nachimtah in iki-

houtheitauvin ahi. Jilna mun School le College phatah tah ineithe tauvin, achungchon in Houbung tin ah kituptah in S/S jong ikilampui theitauvin, Pathen thangvah in umhen.

I thupiu Bible Text Math. 18: 20 hin "Hoilai mun hijong leh Pathen mite kikhopna chan'ah Pakai lhagao jong aum e ti eihet-sah un ahi. Amatoh umkhom ihijeh un;

1. Ama deilou thil ima ibollou diu tina ahi.

2. Ama thujeng bou igeluva khat le khat kitahsan tona hinkho iman diu ahi.

3. Ama chu ngailut Pathen, Aman eiho eingailut banguva eihong khat le khat ikingailut to cheh diu ahi.

4. Colo. 2:3 ah " Ama a chu chihna le hetna Gou jouse kisel ah ahi", ati. Ama a um chihna le hetkhentheina ineilou leh vannoi chonna hi chonset a ilhah a imanthah theiju ahi.

Hijeh chun sopite, Christa a ium teng u Ama eiho'a um ahin, Ama lunggot lam jeng bolnadin ichihna-ihetna, ithaneinao lehinei igou jouse mangchau hitin, Pathen loupina domsang jingu hite.

A sim jouse Pathen in phatthei boh cheh taken.

Rev Onthang Haokip
Secy. Edn Board (KBC)

Penthahna dihtah

*Rev. Henjalen DOUNGEL,
Secretary, Mission*

S E R M O N

Tulajjin Pathen thusei tamtah in penthah kiti hi ahahsalam tahin ahil jeovin ahileh mitamtah din hahsatah, gamlatah, kihambol le holhat vanga muding dana gelloi aumtan ahi. Langkhata hitabang a hahsatah a gela muphah le chanphah dinga gellou tampi aumtai jin agelkhoh kit lou ho chun Christian insunga ahung pen le ahung kiseilet jeh chule athil phabol jeha sohcha jeng dinga kigela penthah thu khol mong mong lou jong tampi aumkit in ahi. Penthah na to kisai ja thucheng kimang koitabang khat dinga hethahsa tah ho chu "Sohcha" "thisana choh dohsa" "thisana soptheng" "pengthah" "Lhatdamchang" chule adang tamtah thucheng hohi ahi. Hiche thucheng ho hi penthah na to kisai ja kimang cha thucheng dihtah chu ahin hinlah mitamtah dia hethahsatah ahi. Bible hi ivetle Pathen in adei chu mijousen bailamtah. Ama koi ahi aheta Achapa Jesu hinale natoh atahsan diujoh chu ahijoi.

1. Sochatna hung kona: "Keima Neiven" "Keima tailou Pathen dang aumpoi"

"keima lam-pi thutah chule hina chu kahi"

=>Jesu Pathen chapa ahi ti tahsana amalam vethin tonsot hinna apetheije. Tonsot hinna kiti hi Pathen a bou um ahi, chule vangam lampi khat bou ahi ti aphochene.

=>Tonsot hinna kiti hi Houbung hoi-tah le hattah khata member himan in aumthei poi. Tuilut jeh jong ahipoi, chule mission phapen khat a um jeh in jong aumdeh poi.

=>Tonsot hinna hi tohphat vanga hilouvin Pathen thilmoh peh joh ahi.

=>Tonsot hinna hi Christa jalla bou umthei ahi.

2. Sochatnan ahoplet dan:-Vanoi pumpi.

Jesu Christa thingpella akikhetbeha athichu vanoi mijouse dinga thi ahi Jn3:16, Heb.2:9. Thingpel a thilsoh hi Pathen in eingailutnao vetsah na lenpen ahi Rom:5:8

Iti chonset jongle hen sochat nahi

keija ding ahipoi tin geldao hite.. Aman nalhagao hinkho ahuh hingsa ahitai. Ajeh chu michonse ho huh hing dinga Christa Jesu chu hung ahi. Matt.9:13.

Christa Jesun athisana vanoi mihem jouse lhatdam na anachan ahitai. Ichonset nao jouse thing leh a apoh doha athipi ahitai. Hiche thisan vanga chu lhatdam chang sa ihi taove.

Keima Neiven: Keima neiven tina ahin thildang imacha apanbe poi, Baptist chan, Houbung a minkhum, hopsom maicham peh, hinkhothenga hin, chule adang Christian khat in aneiding hina ho imacha asei thapoi, keima neiven atihin tahsana neitaha Christa a kipeh lut ding chu sochat nadinga lhingset ahitai atina ahi.

Khatvei kom kom, le sochatna hi bailam behset in igelun inahepha ji pouve, Hijong chu dih deh lou ahi,

"Nangman nakama Jesu chu Pathen chapa ahi tia naphondoha chule Pathen in athilaha konin akaithou tai ti nalunga natahsan le ahing ding nahi. Hiche a kona muthei chu sochat na kiti hi Jesu Tahsana amalam ivet leh asoh chading kihijeng ahi.

Kum 30 vel pasal khat hi Bible conference kahta ahung jaovin amachun hiti hin asijin ahi. Bible a kisei jouse hi katahsanin ahin hiche hin monna eipepoi. Hichun Pathen thusei pachun adongin "nanghi lhagao mangthai nahiti hi nakihet am, chule Christa hi huhhingpu ahiti natahsan em? tin adong in ahileh aman hijong chu katahsane tin adonbut kit in ahi, Hiche pet tah chun Bus khat hi ahung in ahileh pathen thusei pachun "Hiche Bus khu mijouse khopi sunga podinga hung ahi hilou ham? tin adongin ahileh henge tin adonbut in ahi. Avelin adongkitin mijouse apohjiam atin ahile amapan apopoi, asunga toulut hobou apojie tin ahin donbut in ahi. Hiche aseilaitah hin mipa chu ahung kehechenin tun vang kahethem tai "Jesu Chrissta chu vanoi mijouse huhhingdinga hung ahin, ahin ama tahsan hobouchu aman akipuiding ahiti ahin hechen tan ahi. Pathen a kon lungmon nachu ahin neitan amaiso ahung lhanlhai in tahsan jalin Christa Jesu a akipelut tan ahi.

Isei nom uchu Christa hi mijousen avet thei ahi. Tehse le khangdong, mihaosa le migenthei, miching le mimol, miphale le mise, mijousen avetthei ahi. Tunia thudoh lenpen chu Christa Jesu hi navet khah tahem? namu khah tahem? Nahet khah ta hem?

Mitcho akihi ngal lou leh mijou sen akive thei je. Hinlah midang dingin

vang koiman avet peh thei poi, mihon taona nahin man kop thei uve, ahin Jesu mel vetding vang nangma kin ahi. Sochat na hongsung lutingenat ileh nangma ngelnakipata nalut angaije.

Pasal chapang khat hin bel khat a khoiju ahin domin phat khat khat le akhutjung khat agah sulut jin khoiju chu achop jin ahi. Hichu police officer pa hin ahin mun, chapa khoiju chu lhumem ?atileh chapang pachun, hengealharma lhum ahi tin adonbut in ahi. Police officer pa chun avellin adong kit in khoiju chu ichana lhum ham atileh chapang pan jong alharma lhum ahi atin adon but kit in ahi. Hitia adonbut chan chun officer pun ichana lhumham ti adongjing jeng tan ahile chapang pachun khoiju lhumdan hethei lou mong nahileh tin akhut chu abel sunga chun asoh lut kit in khoiju chu akhuta ahin hamdoh in officer pu chu alesah tan ahi. Hichun officer pu chun khoiju chu ichana lhumham ti ahin hechen bep in ahi.

Hitabang hi ahi Christian hinkho a penthah na jong. Lhagaova penthah na neilou khat in penthah thu iti seijin seithem jong leh penthah na dihtah nei ahilou jeh chun hilchen joupon te.. Mipengthah dih tahhon bou penthah thu hi ahil ding hichu aman ahinkho a ahin to sa le aheththem sa bou ahil ding ahi.

Hiche penthah na kiti hi seithem vanga hilou tohphat vanga jong hilou natoh vanga jong hilou Pathen thil mohpeh leiset gouthil a choh jouhoi hilou vankipa na chu ahi. Jesu tahsan in nalhagao hin khon tonsota hinna anei ding ahi.

PATHEN NGAISAHNA LAM'A HINKHO MANG

Pastor Satminlen Thangeo
KBC Youth Secretary

1 Timothy 4:12

*"Nakumlhom nachapan chu koima nahsah mon umсах
hih in, ahin nangman thulam in, nunchan khanchan in,
ngailutna in, tahsan na in chule thenna lam in atahsanho
vetjui dingin um in" (1 Timothy 4: 12)*

Tukhang in khangdong sunga hin Pathen ngaisahna hinkho hi alhasam chehcheh tan hichung chon chun tahsan cha khat akihi jengjong tahlang joutalou vin khangdong aki umgam tan ahi. Vannoija hin setna apung chehcheh in Pathen ngaisahna akhenem suhcheh cheh jengtan, hichea hin khangdong tampi jong Pathen ngaisahna lam'ah hinkho manna alhahsam sah tan ahi. Vannoija chihna le thepna asan cheh cheh leh chonsetna jong apung cheh cheh tan chonset kiti jong khangdong tampin geldauna aneigam tan, chonset khat jong chonsetna simthei talou khop'a hinkho manna phat chun eihin phagam tauvin ahi. Atheng kiti akithet tan, hinkho theng kiti akimudoh joutapan, hichun khangdong ho Pathen lam'a kon'a gamlatna ahin lhut jing ahidan atahlang tan ahi. Hiche phat hi iphah tah jeh un khangdong Pathen ngaisahna lam'a hinkho iman thei nadiuvin Solchah Paul in khangdong Timothy ahilchahna a kon'in tukum Youth Day a dinga hin khangdong hinkho toh kitoh lam'a kihilna nei u hite.

Thu lam'a Pathen ngaisahna

"Thulam in" kitihin kampao mandan aseidohna kicheh tah in akimudoh theiye. Khandon lai ja kampao mandan, pao dan het hi thilphatah ahi. Michunga thilpha iseidoh louding ahileh paolouhi thilphajo ahi. Labolpan jong Pathen kom'ah santhei doltah a thuseidohna aneinadingin anataovin ahi (Labu 119:14). Khandon laihi kihatsah lai, kiphaosah lai, inop nopma thu iseinom lai, pilepu tehle

khang jana umlouva paohoitho patnomlai ahijeh in chihthei angaije. Adeh in Pathen cha khat hina jalla khandon lai ya Pathen ginnale jana pum'a thuseidohna neidinghi thilphatah chu ahi. Chingtheitah le Pathen ginna a thusei chu Pathen ngaisahna vetsahna ahi. Kampaova kon'a jong khangdong khat chun Pathen loupina atah langthei ahi. Kampaova jonghi Pathen toh kinai ihi ihilou hetdohna umthei ahi. Khangdong chingtah, fel-

tah, thusei theitah, jaumtah, melhoitah, boltheitah hijongleu hen Pathen ngaisah tah a thusei-dohna nei angaiye. Nakampao le nathusei dan chun Pathen ngaisahna hinkho namandoh dan tahlang jingin, hichu Pakai kipana ahi.

Nunchan khanchan'a Pathen ngaisahna

"Nunchan khanchan in" kitihin hinkho mandan aseidohna ahi. Ichon chan, ikiman chahna, ilamlahna, hinkho imandan jouse ahopsoh kei ahitai. Khandon laiia nunchan hoilouhi khonunga minu mipa hinunga hoi-dehlou ahi. Nunchan khanchan, hinkho mandan hi Pathen chate dinga thupitah ahi. Ka nu'in "nungahpha chu kholai leng-hih jongleh pasalpha in aumna ahin holdoh teiye" atin ahi. Hichun hinkho pha mangjing ho hi mipa akimuteije ti ahildoh'e. Nungah-gollhan laiia nunchan phatah a hinkho mandoh kitih manlutah ahi. Khandon laiia set-na tampi boldoh hi satan kipana ahin, Pathen ngaisahna hinkho man kitih Pathen a dia mantam-tah ahi. Labolpan jong khangdong ho alamlah jouse athen theina ding chu Pathen thu anit uva bou hithei dingin aseidoh'e (Labu 119: 9). Hichun Pathen thu hi ichan'a khangdong tedia ngaikhoh hitam ti aphot chen ahi. Khandon laiia Pathen thu kipuisah a Pathen thu nitjing hin nunchan khanchan ahinsem dohte ahi. Khandon laihi hinkho a dia manlupen khang ahin nunchan khanchan hoi le phan

mangjingin aga umlouvin jong gelhih beh in.

Ngailutna a Pathen ngaisahna "Ngailutna in" atihin khangdong hinkho ahasuhkhah din tahsan aumme. Ajeh chu ngailut/lungset kitih khandon laiia kiha het-dohpen chu ahi. Gollhang laihi ngailutna thu kihaseidoh lai, nungahkhat dia jong ngailutna kiha phahpoh laitah chu ahi. Hichu ahileh ipilam pang hijongleh ngailutna dihtah lungput kinei hinam tihi kidoh theitah ahi. Nungah-gollhang kingai kideina lampia jong Pathen ngaisahna tahlang ding chu ahi. Hiche ngailutna dihtah chun nungah-gollhang kah'a akimudoh teng lungtupmolsona alhungtheiye. Ngailut dihlouva nungah-gollhang kingai kiti hin aphot loulaiya kichenna, aphot loulaiia tahsa ngaichat suhbulhitna asodohjin ahi. Hichun ngailut dihtah neijeh hilouvin ngailutna chu tahsa ngaichatnan ahinjona ahijoi. Hijeh chun hitobang ngailutna'a chun Pathen ngaisahna tahlhang in aumdoh jou tapoi. Paocham tuh in "Ngailutna dihtah in angah'e" (True love waits) atih khandon laiia hetchet akulle. Nungah dinga jong angailutpen adongma dinga thilpeh lenpen a akichen nikho teng leh ding chu 'athenna' chu ahi. Gollhang in jong nungahhi thiltobanga ngaitolou helding ahi. Ngailut ding, sahlut ding, hepi ding nun le khan kituptah a bolla manlutah ahinau hetpeh ding angaiye. Khandon lai, nungah-gollhan laiia ngailutna'a Pathen

ngaisahna hinkho man hi jinei chaneî nung jenga jong Pathen vangpeh channa lenpen khat ahi tihi suhmil louhel ding in aphaî.

Tahsanna'a Pathen ngaisahna "Tahsan na in" kitihin khangdong khat chu tahsan theidolla hinkho aman hinam tihi kidoh theipaijin alange. Nulepa keu hilouva Pathen jengjong kiha joulhepna phat hi khandonlai ahi. Jou kihaseidohna pen khang jonghi khandon lai ahi. Ipi jeh in em? Changval ngai chat suhbulhitna ding lunggel jeh ahi. Nungah-gollhang in jong anu-apa jong joulhepma angaitah adongma toh hinkho amanjing phat ahi. Chu keu hilouvin nungah-gollhang kikah jenga jong kitahna alhasam tan, akidei akingai hojong kitahlou tah a hinkho kimantona, kilhep tona le kitahsan tolouna adimsettan ahi. Nungah khat gollhang khat jong dongma khatsheh nei alhomjohna hi akah a kitahna lhahsam jeh ahipenne. Gollhang khat in jong nungah jol kitihî kichepna khat dan in agellun, akideipi un, akikhenpi un, laidangah hitobangma boldin pheiphung asongdoh kitjiuvin, kitahna akimudoh jou tapoi. Akidei-akingai ho jong akitahsan to tapouvin, kicheng ding mong mogin jong akigelthei deh pouvin ahi, ajeh chu kitahlou nan vai alojeh ahi. Tulaijin melmulou lungset atamtan, lungsetna lhem apungin, kitahsan tona aumtapon, kitahnan khangdong hinkhoa vai alothei

tapoi. Vo khangdong, nakitah hoiham? vo khangdong tahsan naumna hoiba hitam? Na-Pathen tahsanna na khangdong lai jin tahlengin, hichun nungah-gollhang kikah'a Pathen ngaisahna asodoh ahi.

Thenna lam'a Pathen ngaisahna "Thenna lam in" kithin khangdong khat dinga ngaihahsa pentah thucheng khat ahi. Ajeh chu thenna hinkho kitihî Pathen in adeipen ahivangin khangdong tampin aneilou ahi. Nehle don a thienna athupin hisanga thupi jo chu nungah-gollhang kikah a thenna chu ahi. Tukhang hin chonsetna jong chonset a simtalou, setna khat jong setna'a geltalou khangdong atam tan ahi. Nungah-gollhang khat chu ikideileh set teiteiding ti lunggelna aumdohtan, thenna nungah-gollhang kikah a vai alojou tapoi. Vangset umtah chu, akingai-akidei jousen chonset lungvul aneipa hi ahi. Nungah in jong thenna hinkhoa na Pathen ngaisahna chu gollhang ho anga tahlengin, hichun nachoisang ding, jana nachan sahding ahi. Gollhang in jong thenna hinkho manding gutten in, hichun nahinkho ahinsem jangdin khonunga na-in chen ahinsemhoi ding ahi. Thenna hinkho manglouvin danthenga jinei dingjong gelhî beh in, mihem najoulhep theinan ahinla Pathen najoulhep theipoi. Vannoi vet dia theng lou sasa atheng banga danthenga kichen sanga athenlouna kihetna kijam'a chonset kisihna

neiya Pathen ginna inchen hinsemndoh aphajoi. Tulaija vangset umtah chu "nungah-gollhang laiya nupi upa hinkho manhi ahi." A-ipi chu hitaleh thenna kitihin khangdong hinkhoah vai alo angaije. Khandon laiya thenna hinkho mang akijabol louna aumngaipoi, akija teijin avangpha teije. Thenna tailouva Pa-kom lhunna aumloudan jong Bible in kicheh tah in aseidoh in, khandon laiya hiche thucheng hi geldohjing angaije (Heb. 12: 14).

Khandon laiya Pathen ngaisahna hinkho mandoh dinghi tukhanga dia angaicha pen ahi-tai. Khangdong lamvai atamtan, hougut akimutapoi. Pathen ngaisahna akem in setna mang khangdong apungjingtai. Khandon laiya Pathen ngaisahna umlouna chu khonunga hamphat channa hijouponte. Vannoi vetdin Pathen ngaisahna hinkho mang khangdong hijing ute.

KBC MISSION NA TOH NA A ITAOKOP DIUVA DEISAH



1. Ibomcha, Muslim sakho a kon in Jesu akisantai.

-Th.Prembala.

2. Moreh Meitei Baptist Church akon in atahsan thah mi 2 ahunglut bee (1).Simananda (2).Alfria.

-Evan, Manglemba

3. Pukhao Naharup field akon in tahsanthah mi 2 aumbe e. (1).Ratan (2).Seyam.

-Evan, Khupthang

4. Gurkhali Field akon sopi mi 5 in Jesu akisan u toh lhon in Baptize jong achang uve.

(1). Monika Sharma (2). Roshan Sewa (3). Kater Sewa (4).Krishtina Giree le (5).Vikra Giree.

-Rev, Jeeten Gajmer.

Mission Column

Songphel Baptist Church KBC No 2

Revival Programme 2017

Dt.18-20th August 2017 nisungchun Songphel Houbung kum tohgon Revival programme chu Rev, Henjalen Dounel KBC Mission Secretary speaker hinan anakimang tan ahi.

Hiche programme ahin khosung mijouse tomngai tah in apang cheh uvin tahsa le lhagao hinkho dinmun kikhelna anei un ahi. Kipa umtah khat chu tulai Haosa atamjon Houin kai taona gelkhohlou va kivaihomna kong atollai jin Songphel khojolsung Haosapu le ain-neipi hi taona gelkhoh, maicham le Houbung gelkhohtah ahihon in kaikhomna jousea amasapen a pang a vahchoilasah thanom tah Pathen adia kihamboltah Haosa ahihon e. Hitabang pathen ging haosa inei jehun kipa thu akiphonge.

Pakai jallin Revival programme lolhingtah in akichaijin Pathen thangvahna ipeovin ahi.

Songphel Houbung mite

Mission natohdan

Songphel le akimvella Nepali Pathen houlouho khomi Houbung in aboipi danle agelkhohdan hi ahoi lhez jeng e. Amahon Leplen Centre a kikoi Evan, Kamal Tamang hi Church kitchen a apansat natheiding asempih uvin aji, achate toh aumkhomsah un, tahsan louho aboipina din tohgon hoitah asem pehun ahi. Hia hin Evangelist te Innsung hi Anneh, Twidon Mission in abon chan apoh-dohpih un, jingkah nilhah in Me, angaichat jouse vatlouhel in apeovin ahi. Hitabang a Houbung miten Evangelist pu agelkhoh uva, chuleh agamsung uva cheng Nepali lhagao mangthai ding ho pohnatna nei a aboipi nau chung ah KBC Mission Board thalheng in kipathu ahung kiseije.

Pathen in houbung sung phatthei boh jing henlang, lhagaomang thai ding gelnat na a tohgon anei houle apan lahnao, Chung Pathen in phatthei boh uhenlang lolhin na pejing taohen.

July lhasung a Manipur gamsung a

Sopi Gurkha hole Hindi holah a Ministry Report chomcha

1. Hindi Baptist Church, Moreh: Nupa Camp. Achesa 4-7 July 2017 sungchun Moreh Hindi Baptist Church a Nupa Camp anakibol in ahi. Speaker in Rev, Jeetan Gazmer, Gurkha field Supervisor KBC le Evan Chinkholam Vaiphei chule Camp Director John Haokip apang in ahi. Delegate 36(couples) tabang ahungpang u vin ahi. Camp ahchun mi 11 tabang in lung kikhelna anei uvin ahi. Chule Nu Monika kitinu hi Hindu background a kon ahin, hiche camp akan in penthahna aneitoh kilhon in Baptize jong achang paipai tan ahi. Chule Ainneipu toh Pindan kichen jong akibolpih tan ahi.

Achesa 7 July 2017 nia KBC Mission Board makaina noiya Tamu a um sopi Gurkha holah a Fellowship hondoh nale phondohna Pu Rev, Henjalen Doungel, Mission Secretary KBC in aneitan ahi.

2. Tuilang Area Mission Report chomcha

Achesa 22,7,2017 nikho a Sopi Kumar Sewa, achapa le Mounu Roshan Sewa, Kater Sora (Sewa) Pathen a lungheina le penthahna Nei u toh Ihon in Dt, 23-7-2017 nikhon Baptize aching taove.

Sopi Sh. Krishna Giri chateni Vikram Giri, Krishna Giri amanin jong Pathen a lungheina le penthahna neihon-toh Ihon in Baptize jong achang hontai. Amaho sese hi Immanuel Gurkha Baptist church, Lamchok a member ahitaovin ahi.



Achung a iseiho jouse u hi Houbung mite itaonao le Pathen phatthei boh ichen na u ahi. Chule Pathen lenggam machal nading a isopi Gurkha ho le adang dang hodin taonan panla jing uhite.

Kakipah e.

Rev, Jeeten Gazmer

Gurkha Field Supervisor, KBC Manipur-India.

II.Foreign Missionary ho Paojil.

Tulai tah hi Foreign missionaries inei houvin agampao ajil laitahu ahi. Missionary Letminthang Haokip in Chinese pao ajilin Missionary Shirelyn Lhingpineng Khongsai jin Laos pao ajil in Chule Missionary Lhingneikim Haokip in Cambodia pao ajil e

Mipao jil kiti hi abai loudan ihet soh kei u ahi. Ipen nao gampao Meilhei pao jeng jong tuni chana ideibang a kitho doh jou lou lai ahi. Pathen natoh nadinga hi agampao akiheth masat lou leh amachal lou nading ajeh tamtah um ahijeh in amaho chengin agampao ajilu hi houbung miten aheththem vah nadiuvin Chih na jouse hung kona Pathen henga taonan lhut jingu hite.

Chakpi Molbem (Sugnu Nepali) le Chingmeirong Imphal a Evangelist tenin aman chah ding Cycle ni kichoh peh;

Achesa nisim 23th Aug nichun Serou (Chakpi Molbem) le Chingmeirong Imphala Evangelist ni Evan.Prem Thapa le Bijay Ghatani man din cycle khat cheh Mission in akichoh peh in ahi.Mission Secretary Rev Henjalen Dounge in ngaichat ahijalla kicho ahina phondoh na anei jin Pu Jamkothang Haokip Mission Chairman le Pu Haopu Mission Board member chule Nepali Field Supervisor Rev Jeeten Gajmer pannan Rev Letpu Kipgen Finance Secretary in Thenso na ananei tan ahi. Pathen thangvah in umtahn.

Rev Henjalen Dounge, Secretary
Mission & Evangelism KBC

Mission Field LAOS akan LEKHATHOT

Amasan damna le phatpha eipi a tuni a tohphon pi thei ding'a ka um jal in pathen ka thangvah in ahi. Houbung mite hon nei ngailut nao leh nei taopih nao jal in ka umna gam'a lungmong le dam in ka toh ban kajom jing thei in ahi.

1. Katohna mun a dam in ka um jing in, katoh khompi hole ka chapang ho ngailut ka chang jing in ahi.

2. Lao pao ka jilna a jong Pathen lungset jal le houbung miten taopih najal in ka machal jing in 2nd term jong July 28th in kana chaitan ahi.

3. GIC team kajao nia kipat in amaho tohgon naho a pan kala jing in, chuleh tukom tohgon lah a khat hi, Dongdok Univerity a khangdongho kiloikhom na boldoh ding ti ahijeh chun a vel in houbung mite hon na taonao vah nei hin geldoh kit un tia kahung tao ahi.

4. Kaum nagam a June lha chun province khat a Pathen tahsan thah mipa khat in a in-sung mite jouse chem in anasat lih in ama le ama jong aki that in ahi. Ajeh chu ahi le Pathen kitahsan ta epi ding a leiset a genthei kithoh ding ham? kithi le vangam kilut ding tia kinepna ana nei khel jeh ahi. Thulam lengin khat in asej nah'a chun Govt hon a force jih a kithat ahi tin jong aki thang in ahi vang in ema thuchen akihe pon, hijeh chun houbung mite hon a vel in kaum na gam mite adin nei hin taopih kit un tia kahin tem ahi.

Taona Ngaichat :-

- a) Ka natoh nah a ka machal jing thei a loi le golpha kaki sem be jing theina ding.
- b) Tahsa le lhagao a dam nale hal na kanei jing theina ding.
- c) Lao class ka jaona a khan tou be jing na ding leh hiche class akon loi kan kitem doh be theina ding
- d) Dongdok university a khangdongho English class boldoh ah aum nading.
- e) Ka school uva Chapang ho ding le nu le pa te ho ding chuleh Dindee school a na tong Staff ho jouse leh Director pan kilungtoh tah a pan kalah khom jing theina diu le Pathen thu ka sei phong jing thein a diu.

Kakipah e,
Sheryl N Lhingpineng Khongsai
Laos

FIELD MUN'A KON HOUBUNG LEKHATHOT

28th May – July, 2017

Amasan houbung mite heng'a tohphon (Newsletter) lekhatoh hinjeh theiya damna eipe'ahlho Pa Pathen thangvahna kahinpen ahi. Phatseh'a taona leh thumna eihin neipeh, Pathen lenggam natohna'a eihin tosot leh eihin dinpi houbung mite jouse chung'ah kakipana kahin phong in ahi. Houbung mite hetding in kaki manchah dan lhon leh nataona gaa'u phabep hin tahlang inge.

1. Barbecue Day Out



28th May nichun University students kana viljing ho utoh Barbecue Day- out adin Moul khat'a kanache un ahi. A barbecue leh a moul hi thupi ahipon, Pathen helou khangdong ho thanop thei nadin keiho, Inn-houbung hon hitobang phat kaneipi un, hiche moulvum'ah Pathen vahchoi laa sahhom naleh Pathen milungsetna thu jong kana seipeh un ahi.

2. Pansahna Inn Mun

Pathen lungset leh houbung mite taopeh najal in hiche lang gam'a ana um loi le pai teho kithopina jalin inn mun nikho tampi leh tha tampi lut'a kana hol uh chu, Dt. 05th June nin inn thah kanalo lhonin, kana pansa thei lhon tan ahi.

3. Bharatian Community Kithopina

Eiho gam'a kon Pathen natong Kunming khopi'a umkhom cheng in, kakichen Ihon kipapi naleh inn chen sempat nading in thil leh lo, tha leh jung chuleh taonan nasatah in eina kithopi Ihon in ahi.

4. Huayang Academy

Foreign gam'a umnathei leh Pathen natoh nathei ding'a angaicha pen chu visa ahi. Pansah nading visa leh agam pao ngaichat hi thakhat ahithon Ihonin, Huayang Academy in enrolled kana kibol in, kumkhat (23-June-2017 to 10-June-18) umthei nading chu visa kana kilah Ihon tan ahi.

5. Tahsan Twilut Thah



Pathen phatthei boh leh houbung mite taona vangin keiho Inn-houbung leh local Inn houbung partnership jal'n, achesa 16th July Sunday nikho chun tahsan thah mi li (4) tahsan twilut kana chan un ahi. Tahsan twilut changhon Christa toh chan anei uh kipana jal'n mitlhi longpum in twi analut un ahi. [2]

5. Summer Camp

Dt. 1 – 2, July sungin Chengjiang (Fuxian Lake) mun'ah University students hotoh Summer Camp kana nei uvin ahi. Hiche camp sungin Pathen vahchoilaa sahkhomna, Pathen thu simkhom naleh Pathen mi ngailutna thupha jong kasei peh pan uvin ahi. Muchi kitu hi Pathen in phatthei ahinboh'a gaa ahungso nading in houbung miten taonan neihin kop jing diuvin kahung taovin ahi.

TAONA NGAICHAT

1. Tahsa damthei nading
2. Agampao hetvah nading
3. Agam mite golpha kanei be Ihon nading

Pakai'a natoh khompiu
Mr & Mrs. Daniel Mimin Haokip
KBC, M. Co-Ordinator, SEA

ELIJAH TAONA MOUL LAMPI KIKHELTA.

Kuki Baptist Convention Mission Board mopoh nanoija ineisunnu Taona Mol "Elijah Prayer Mount" Gothol lampi Army camp kihopa-jeha hahsatna anakitoh jingchu lampi kikhelna natosh achi lha pan tai.

Gothol apat Taona Mol chan lampi paltan lama anakinei chu semphattheichan akhinei Haosapu Pu Hillun Haokip in khomite to kitho a kumlelhah ijat hi ahinboipi jing ahin, hinlah lamdung hi lhanghoh ahat jin kumseh in lamlhong lhungin asuse chehcheh in ahileh tulanghin Saktiman tilougari akaldoh jouta pon ahi.



Taona manga chejouse Army camp hopa a cheteitei ahijehin hahsatna hi tampi ahung kitoh tan ahileh KBC Mission Board in pohnatna akineiijin 2017 Manipur Assembly Election a Henglep Constituency a mipi deisah nachang a hung kaidoh Pu TT Haokip Hill Area Committee Chairman pukoma Taonamoul lampi semphat ahiding ngaichat ahidan agakiseijin temna akineiijin ahi. Kipa umtahn Minister pun lunglutna neitahn pan ahinlan, Khotol haosapun agam thing le song ittlo hellin lamthah satnading survey ahinbollin tuhin Lampi luipa repairing hita louvin New Cutting johakibol tan ahi. Lampi ninglhing tah in akikehlen tan akenlaichom umtalouvin Taona Moul chan gari neova kaldoh natheijin lamlhong akisulen tan ahi. Chule Gothol a pat Taona Moulchan song (singling)jongkisung ding ahi tin Minister pun aseijinahi.

Kumtamtah inaboinao lampi semphatna aumna dia taona gelkoh lamkai khat Pathenin eihinpeh jallun Amintheng ithangvah

unnikhat le Blacktop ahung hiding jong kinap aume. Chule Electricity jong Ihunlut a aumding hi kingaicha jingnalai ahin itaonaova anageldoh jing ute.

Pathen in Taona moul lampi hingelkhoh Pu TT Haokip le insung chule Taona moola mandia agamleiset itlouhella hintohdoh Pu Hillun Haokip Gothol Haosapu phatthei bohjing taken.

Rev. Henjalen Doungel, Mission Secretary.

Tabitha Girls Hostel



Tabitha Girls Hostel hi Indra Gandhi Govt. College komcha mun kilemtah a um ahi.

KBC Mission tohgonna noi ah 25 May 2017 nin Rev Ngamjapao Haokip GS KBC in ana thenson, 13 July 2017 nin amunna ana kipansapan tai. 22 July apet nin student ho aumpen uvin tutuhin mi 6 aum uvin, Pathen phasah ahile Sept. Lhale mini hunglut be kit ding ahi.

Nehlechah gena lupna kitupchan akibolpeh uvin ahi. Jingkah 6-6:30 personal devotion, Nilhah 10-10:30 personal devotion. Every wednesday 7:30 le prayer fellowship akibol jing on christian hilou ho jong akiponsah jing in ahi. Every sunday le Mekailiang Baptist Church a akilaikhompi jing uve. Christian hiloi hon Jesu Christa huhhingpu a akisan nadiu le Student hon exam a phachanna sangtah2 ahin nei uva Pathen le i Hostel u ahin dopsan na diuvn Houbung mite taona ngaichat ahi jing e.

*Evan. Seiminthang Kipgen
Warden, Tabitha Girls Hostel*

IPI JEHA CHRISTIAN TE KISUGENTHEI A KITHAT JI AHIDEM?

Christian te kisuh genthei lo na ajeh tampi aume.

1. Thunei na jouse tuha government in Pathenhoul chule thulhangsap hi amaho thanei na noijenga koiding anopjeh u.

Christian te kisuhgenthei na hi ajeh tam pi aume. Gamphabepa hin Gamvaipo loi thunei val jeha soh aumme, North Korea chule adang Communist gamho a thunei government in gamsung sakho

Control ding anom un ahi. Hitabang Govt hin houkiloi khom phabep hi galmi danin agel jiovin ahi, ajehchu amaho hin avaihom nao hintat thei dingle suboi thei dinga aginmo jiu ahi.

2. Houbih lhom hijeh a musit na:

Christian te kisuhgenthei na ajeh khat kit chu Houbih lhom le chom jeh hi ahikite. eg Nigerea a hin 98% hi muslim ahi. Muslim tamjeh hin Govt. akon hitalou vin mipi laha konin houchom alhomho hi suhmang nom na lungthim aumthei jin hijong hi chrisian te kisuhgenthei na ajeh khat ahi kite.

3. Human Rights kijapeh to louna

Human Rights kija peh to kiti hi mihem kijabol na lenpen ahi. Hiche hin thaneina kija peh to lou jeha Christian kisuhgenthei na soh a jong tampi aume. Mihem khat hinkhoa houthua chamlena lungel le ngaito a chamlena kiti hi ngai ma ma ahi. I Pathen tahsan danu hin eiho koi itabang mi ihiuvam ti aphong doh in chule hiche hi I society adinga ipan lahna hung kipat na jong ahi. Ahin tunin mitam tah mihemkhat hina chamlena suboi Government noija achen tah jehun achamlenao jouse akilah mang peh in lung mong a hinkho mang thei lou Pathen jong houthui lou vin aum taove.

1966 kumin United Nations in ACCPR Article 18 ah Mihem chamlenna li apeh ben ahi.

1. Lungel kigelkhenna chule Houva chamlena.

2. Pathen houna a koimachan michom khat hunamaabol lou ding ahi.

3. Mihem khat in amadeitah Pathen akihou ding ahi.

4. Gam Government chu Nule Paten chate apathen hounaova mopoh na alah pehbanga agammiten adeisah Pathen houna a nule pa a pang ding jong ahiuve.

Chunga kisei point ho hi ahung kihet them hih a mihemkhat hina ahung kija bolpeh lou teng genthei na tinchang hung lhung jia Pathen houna lama chamlen loubehle lungmong lou beha hinkho man na hung lhung ji ahi.

MEN COLUMN

2017 MEN DEPARTMENT ASSEMBLY MUNDING THUA HETSAHNA.


The 36th Men Department Assembly Lonpi Khonou Baptist Church KBC No.12 a Resolution No.3 na a kisei 37th Assembly munding KBC No.9 a bol dingin kiphatsah anahi in, ahinlah akilem louna khat aumtah jeh in, Men Work Committee in 25th August, 2017 nin akigel khomin Resolution No.1:3/17 na, 37th Men Department Assembly hi G..Songlung Baptist Church, KBC Gambih No.4 munna umding ahitai tin kolol lhahna akineitai, hijeh chun Pate ho jouse kom'a achunga kisei munna hi tukum Assembly umding ahitai tia hetsahna kahin nei ahi.

MEN WORK COMMITTEE TOUR



Pathen phatna jallin KBC Men Work Committee cheng Gambih No.16 a 4-7 August, 2017 sungin Tour akichen Gambih No.16 lamkai chengin, Gambih Office munna Pakai jallin eina vailhun uvin, chutoh lhonnin Gambih Men lamkai hon jong Tour sunga eilhonpiu vin chule Houbung akichena jouse in jong Pakai jallin neh le chah lhunna gena kitup tah in eina bol peh jeh uvin, achung cheh uva kipa thu seijoulou Men Department thalhengin akiphonge.

Pakai Lhacha,
Rev. Kaikam Chongloi
Secretary, Men Dept. KBC.



8 OCTOBER 2017, SUNDAY

Ahunglung ding nisim 8th October Sunday nikho leh KBC Youth Department tohgonna noiya kumseh le ana kiboljing Bible Quest chu Exam center kipe jousea bold-ingin kigotna akichaisohtan ahi. Hijeh chun muntin'a Houbung miten jong kumseh a kiboljing hiche Bible Quest Exam nikho hi neina hetpeh diuvin temna akinei-ye.

Hito Ihon chun Exam Center jousea exam boldingho list hi Invigilator ho kipesoh keiding ahin, exam boljousen jong kikhuthenna abolna ding jong aum in, ahung ahunglou kichehtah'a kihe ding ahitai. BQ chungchanga hi Gambih/Gamkai jousea Youth ho mopohna le ngansena kipe ahijeh in amaho gonna noiya hungchelha ding ahi.

BQ PHAT: 10:30AM – 1:00PM
(Pungkah 2 ½ sungbou hitheiding ahi)

KIMUTO KHOMNA

KBC le KBA Youth Lamkaiho

Nisim 2-5 August 2017 sung chun KBA Nagaland a Youth lamkaiho ahung kalsong un KBC Youth lamkai hotoh kimuto khomna le kihoukhomna ana umin ahi. Hiche kin'a chun tohkhompi Youth lamkaihon pan alahnau suhmilthei jin akigelpun amaho chungchekh in kipa thu sangtah in akiphonge. Chukey hilouvin Houbungbung hon jong pan eilahpeunau akimun amaho chungga jong kipa thu akiseikitne. Chuban in nehle chah eipohdoh peh uva Centre Church thum'a youth ho jallin Pathen thangvahna ipeuve.

Nehle chah anapodoh hochu:

1. Youth Department KBC Centre Church Kangpokpi
2. Youth Department KBC Centre Church New Lambulane
3. Youth Department KBC Centre Church Canaan Veng, Imphal

BYPF SEPTEMBER TAONA BIDOI HO

September a BYPF a taona nikho dinghi nisim 30th ahitoh lhon in muntin a khanglaiten jong taokhomna nikhoa ina manjing diuva temna le hetsahna hung kineikit ahi. Hito lhon chun anoiya chenghi taona bidoiyin ahung kitah lange.

1. Youth Employee's Day imanthei jeh uva Pathen thangvahna
2. BQ nikho dam le bitna imu thei nadiu
3. BQ a pangding jouse dam le bitna apansoh kei thei nading
4. KBC Youth Day, October 2, Sunday phatah a imancheh thei nadiu
5. KBC Youth Day nikho man nadia Gambih jouse akigong banga achelbah nading
6. KBC Youth Day kingon na jousea speaker le resource per sons jouse ding
7. KBC pumpia Youth lamkai jouse ding

EDUCATION SUNDAY-2017

(Ipijeh a Houbung in Education Sunday hi iman khoh ten'u ham?)

Thupi : "GATHERED IN MY NAME" (Kamin'a kikhom. "

Bible Text :- Mathew 18:20) Bible chang Simbeding ho:-

- Exodus 12:1-14
- Psalm 149
- Romans 13:8-14

Introduction

Pakai Christa thisen'a them chankhompi KBC sunga Alengpi leija tohkhompi Pastor ho le Houbung lamkaite, chuleh ngailut Houbung mitheng te jouse KBC Education Board min in min'lah a minngeipen I Pakai Jesu minthengin Salam kahinpeuve. Kumseh a l'hinman jing u, "Education Sunday" hi tukum a Sept. 10 leh iman kitna diuvin ahung kigongin, ahung kipatdol leh ngaichat ahina ho achomlam tah in noiya hin ahinkitah lange.

"Education Sunday" hi Vannoija gam tampi'n Kum 100 val hi kumseh in ahin mangun ahi. Hche hi atamjo a Christian gam khangtou hon Pathen thu'a kisuitohna a ahin'manjiu hidin tahsan ahi. Tumasangse a chu Easter Sunday jouva Sunday 9 channa hi 'Education-Day' a ahin man uchu, 2016 kum'a pat in September sunga 2nd Sunday joh hi kitoh tah a mandin Vannoija Edn lam'a mopo (UNESCO) lamkaiten thulhuhna thah ahinsem'un, hichetoh lhon'a chu tukum eihon jong Sept. 10 (2nd Sunday) hi imandiuva hung kigong a, a thupi jong hi hung kitah lang ahi. Gamdang Namdang hon hiche nikhole hin khangdong/khangthah lekhasim ho din Program atumbek in agonpeh un, taona amanpehjiuvin, sumle pai atohkhom jiuvin, hichu themjilna lam'a amanchah jiuva, themjilnom alhasam atahlelte ho kithopina'a apehjiu ahi.

Hiche nikho hi eihon jong imanna diuvin anoilam'ah Program le Taona Item phabep Tentative in ahin kitah doh in, KBC Houbung jousen kituptah a imancheh diuvin Houbung lamkai jouse temna sangpen ahin kineiye. Hiche nikho'a Collection imujat u chu KBC Office'a aloutheilouva ihung thahcheh diuvin jong tem ihuive. Ningkum 2016 chan record ho akivet leh Houbung Offering hungthah lou akitamlheh jengin, phamo akisalheh e. Tukum hi Educa-

tion Board in tohgon tampi akineijin, Convention leh Pathen Lenggam machalna ding, chule itohgon hou alohinna din Houbung miten hatah in gelkhoh uhitin, hiche ho hinsufel dingin Gambih/Centre Church Pastor ho leh Houbung tin'a Deacon ho ngeh ihijinguve.

PROGRAM HIGH-LIGHTS

<i>Houkhom lamkai</i>	: S/S Spdt.
<i>Phatpat taona</i>	: Chairman, Men Dept.
<i>Labung</i>	: BYD
<i>Bible simdoh</i>	: Chair-person, W/Dept.
<i>Offering ho lhandoh</i>	: Pastor/Hd Dn
<i>Special no.</i>	: Jillai ho(Student ho)
<i>Thupi seiding</i>	: Pastor/Head Deacon/Guest speaker
<i>Kikhenna taona – mipi</i>	: Achaiding - M/E Chairman


Note:- Houkhom lamkaija pang hon Taona item ho mangcha a mipi Taona alamkaidiu ahi

TAONA ITEM HO:-

1. Inam sunga khangthah lekha them tampi ineitheijeh uvin Pathen thangvah ute
2. I-namsunga khangthah te thepjilna lam'a amachaljinguva, Officer pha, nampi lamkai le Hou lamkai pha2 tampi ahung kisp doh theina diuvn taovu hite
3. Muntin'a School le College, university ho'a simlai ichateu ho leh ajilnao Institution ho, adeh in Dr Colvin Academy, Moreh le Kanggui Christian College Kangpokpi a Oja hole Student hodn taopeh ute.
4. Insung genthei jeha lekhasimna lam a hahsatna toh chate ho taopeh ute.
5. KBC Education Board member ho chule kumsunga tohgon ho ahn suhbulhit theina diuvn taopeh ute

Tohgonho:

- i. Dr Colvin Academy, Moreh amun suhtoh'a aumtheinading,
- ii. Kanggui Christian College building sahjouva aumtheinading



LITERATURE COLUMN

Report

Pr. Haoneo Haokip, Secretary, Literature & Publication

Literature & Publication Department mopohna noiya Convention tohgon dungjuiyin achesa 12th August, 2017 nikho chun KBC Literary Meet-2017 chu KBC thusim a amasapenin Centre Church, New Lambulane, Imphal munah nomtah le lolhing tah in anakibol chaitan ahi. Sum le pai, lung le tha le phat sulut a kitetna (Competition item) hoa pontho tah a pan hinla gambih ho jouse le kitetna a pang mimal jouse; ahingongtup a pang gambih pastor ho le lamkaiho, chule houbung lamkoi ho le Sunday School jilkung ho; kin nikhoa akisaboia pang Judge ho le panmun dang danga pan la a programmme lolhinsah ho jouse; phaitol centre church choir ho le Baptist Church Chassad Avenue Imphal Choir; video coverage le camera man a pang Pu James Haokip, ISTV Eimi (Integrity) programme a pan eilah peh u sopi Paoneo Haokip, chule Chore-



ography Competition a Prize ding sum hintoh pu Tonghen Kip-

gen (1st prize), Pr Haoneo Haokip (2nd prize) le pu Jamsei Haokip (3rd prize); amaho jouse chungu Literature & Publication Committee minin seijou lou khopset in kipa thu ahung kiphonge. Thanom tah le tomngai tah a kin a hunglha a kin hung lolhinsah le hung jemhoi mipi ho jouse chungu jong kipa thu sangtah in ahung kiphonge, Pathenin Phat-thei eiboh jom jing tauhen!

Kitetna (Competition item) hoa Result

Essay Writing

First : M. Jhon Ngamminthang Haokip, Baptist Church, Chassad Avenue, Imphal, KBC Gb. 1

Second : Lamneihei @ Hoineo, Zalenphai Baptist Church, KBC Gb. No. 08

Third : Thangginmang Haokip, G. Songlung Baptist Church, KBC Gb. No. 04

Poetry

First : Lhingboithem Teresa Lupho, Maphou Baptist Church, KBC Gb. No. 01

Second: Paogoulam Kipgen, Pangjang Baptist Church, KBC Gb. No. 03

Third : Tingneihei Mate, Moreh Baptist Church, KBC Gb. No. 15

Painting

First : Neilam Singsit, KBC Gb. No. 01

Second: Paokhotinchor Haokip, KBC Gb. No. 04

Third : Thanggouhao Haokip, KBC Gb. No. 05

Pilhing Quiz

First : KBC Gb. No. 01 Second : KBC Gb. No. 03 Third : KBC Gb. No. 04

Senior 2 Quiz

First : KBC Gb. No. 05 Second : KBC Gb. No. 01 Third : KBC Gb. No. 04

Choreography

First : KBC Gb. No. 01 Second : KBC Gb. No. 09 Third : KBC Gb. No. 16

Essay le Poetry a first lateni thiljih mipi simtheidin ahung kitah lange.

ESAAY

Sunday School Khantou-machal Benading Lampi

M. John Ngamminthang Haokip, Baptist Church, Chassad Avenue, Imphal, KBC ganbih No 01

Sunday School kiti hi Christain teding a tahsa le lhagao a kihilna themjilna mun khat ahi. Adeh a Christain ten achateho Pathen thu le laa a, kihilna le kipui na mun khat chu ahi. Ahilouleh Sunday School kiti hi Sunday nia Houin a class kila a, Christian chaten houthu agajil na mun tina ahi. Sunday School

movement hi Britian gam 1780s lai a,Industrial Revolution hung um til a chu kipan ahi. Hiche a hin chapang ho hi sunjan tih umlou va na ana tongjin uvin ahi.Hiche umchan pohnat jallin pu Evan. Robert Raikes(1736-1811) hin Sunday School umna ding a natos anapat ahi.Hiche a konna hi Sunday School hi aban aban a hung machal ahi. Sunday school hin thil asemphan chuleh thil tamtah akikhel sah thei in ahi.

Sunday School thupi dan hin Pathen thu a hetna le thepna (Bible Knowledge) aneisah in ahi. Chuleh Sunday School a hin (Spiritual Growth) lhagao a khantou na aum in ahi. E oja hole eloi epau ho a konna vetjui thei tah a kihil na thei, akinei thei in ahi. Sunday School hin (place to Provide) lunggel seithei nale khat le khat kihou na mun apen, hiche a konna hin mipi lah hihan houbung sung hihan lang kikhop nalah hijongle thusei doh ngam nale thepna akineithei in ahi. Chuleh Sunday School hi (Meaningful Relationship) chapang hole oja ho kikhah a kinai nale kingailut na apen, hiche a kon a lunggel seithei na hihan epi hijong le ngam(transparent) tah in aki houthei un ahi. Sunday School hin phat pha le phat hoi thilpha bol numun kilemchang apen ahi.Chuleh Sunday School hin insung mite toh kihoulim theinale Pathen thu ho simkhom na apen ahi.Chapang ho le pilhing hon jong kihil na aneiji uvin ahi. Chuleh Sunday School a hin adih a Chapang ho ding a hin Lamkai(leadership) hithei na ding a kibulphu na khat jong ahi. Chuleh adeh a chapang hon aloi apai teu ho koma Pathen thu ngai ding a akaihoi thei uva chule kivop thei u ahi. Houbung hin taona le kiguijop pi na a atao pih jing khat chu ahi. Adeh a Sunday school hin Christa nungjui di a sepoy hina avetsah ahi. Hiche jeh a hi Sunday school hi thupi mong mong ahi.

Sunday School hi tahsa le lhagao a kihil na phatah ahijeh in atup le ado i hi akicheh in ahi. Gahsei ding in Christa bahkai hin khut jung li anei in ahi. thuhil,kipana thupha,khat le khat kisin sah na le mun gamlha(outreach) phah na jong ahi.Hijeh hin Christa kipana thupha seiphong ding le khat le khat kingailut nale Pathen thua a kihil na le kitilkhoh na ho hi atup le doi thupi pen ahi. Chuleh Christa Seijui hina hin nasa tah in kikhel na apo doh thei in ahi. Hijeh a hin hinkho kikhel la Pathen heloulai ho het na ding a tohgon kinei jong hi ahi. Chuleh Pathen thu tah san a, akhon ni agei a dettah a thilse hihan lang epi lhez na hijong le tuh det taha a pan ding hi ahi.Chuleh Sunday School hin tup le doi anei kit jong chu ahile; chapang ho hi phatah le kitup tah a khantou sah a ahinau dihtah Christa a, ahinau seipih ding ti ahi,chuleh chapang hon pathen in athilgon le amaho ding a angaito u asuhbulhit ding ahi ti seipeh a,chuleh khonung khompi le lamkai ahinau hetsah a,chuleh Christa seijui hinale lhagao mangthai ho huh doh ding hi seipih ding ahi.

Masang lai a K.B.C sung a jong khantou nale machal na chu ana umnai. Houbung lamkai hole Pathen mite hon Sunday School kaiding ana khohsah lhez jeng uvin ahi,ajeh chu chapang hon Pathen thu a kihil na le kipui jong na anei diu chu ana gelkhoh uvin ahi. Hiti chun Pathen thule laa in ana kilamkai uvin Oja hon jong ngailut na nei tah in ana lam hil jiuvin ahi. Adih in Lamkai hon lungpi keng in na toh tampi ana gonguvin ahi. Chule tunung

a ana kiboldoh ho jouse jong hi masanglai phat a anagel ho le lamkai hojeh ahi. Hijengjongle amahon etobang in ana gel u jong le adei bang un phah jou na chu ana nei pouvin ahi. Hijongle K.B.C sung a convention lam hijongle bol thei chan in ana bol uvin, hitichun ajokham chan uvin pan ana la uvin ana kito sot jing uvin ahi.

Pathen lungset jal in K.B.C a hungkhan tou toutou toh kilhon in Sunday School lam a jong ahung khang tou tan ahi. Adeh a Convention in a kum seh a Teachers Training a bol uva a Pathen thu le laa a ki hil na le ki lamkai nau anei u hin, nasatah in thil aphachom in ahi. Thil phatah ahin tong doh in ahi. Ajeh chu Lamkai in hetna anei teng ahil ding chapang ho kom a chun ngam tah le phatah in ahil thei in ahi. Chuleh adeh a Laa thah kisa a tumging toh jat chom a laa kikhum a laa kistem hin chapang ho chung a nasatah in kipana le suhhal na apen ahi. Ajeh chu Laa hin nasatah in mi akipa sah in atilkhon in chuleh lunglut na apen ahi. Chuna banna jong Sunday school Exam aum hin nasatah in chapang ho hetna le Pathen thu het na anei jing uvin ahi. Sunday School Day tia akiman jing jong hin nasatah in akhan tou sah in misuhal le chapang ho dia kipa na golnop nikhat ahi. Hiche thil kibol ho hin nasatah in tu eiho K.B.C sunga hin Sunday School ahin sah in chuleh amachal sah thei in ahi.

Sunday School kiti hi tahsa le lhagao a themjil namun khat ahi. Phat masa lai a le tulai a Sunday School dinmun akikhi lhez in ahi. Hijongle malam a Sunday School khantou machal na ding a hin bol ding tampi aum in ahi. Akhat na a Houbung hin Pan nasatah alah ngai in ahi. Christian sakho a tahsan chate kiloi khom na chu Houbung ahi. Hijeh a chu Houbung hinging le haljing ahi ngai in ahi. Chuleh ani na a Houbung sunga Lamkai Pakai-ya kilheng doh ho hin lhagao a dim le Pathen ging ahi ngai uve. Ajeh chu Houbung kivaipohna (administration) na sung le kiman chah na sung a hi lamkai (Board of Deacon) ho hi avesui, achingtup akaihoi le asempha hui ahi. Chuleh, Thum na hi Sunday School Oja ding a kilheng ho hi Pathen ging, Pathen a konna penthah na neimi ahi ngaiyun ahi. Sunday School oja a kilhengdoh ho hin Sunday School khantou le machal sah na ding a hin pan lentah ananei un ahi. Ajeh chu chapang ho toh hung kisin ding ahijeh u chun, ema lam jouse a kihil le lakisa jouse a phattin a hungkimang cha khomuva, hung kisinsah ding ahiuvin ahi. Ajeh chu chihna le hetna anei angaiyun ahi. Chule chapang toh kisin na hihan pilhng lang hijong le longdella chekhom thei diu ahi. Chuleh a li na a hin Nule Pa te hin Sunday School lampang a panmun lentah ananei kit uvin ahi. Ajeh chu chate lamhil ding le khaokhah ding chu amaho ahin hiche na ding a jong Sunday School a jao sah ding jong nule pa te a kon ahi. Nule Paten chate ho themjil na lampang a akhohsa na bangun jong lhagao lam a jong, chate Sunday School akaisah jing u ngai ahi. Hijeh hin nule pa ten chate gelkhoh najal a Sunday School a ahinsol ji na chung uva sunday school lam machal na khat ahi. Hijeh a chu nule paten pan alah ngai u ahi. Angana a hin laa le Tumging hin (songs and music) nasatah a Sunday School hi khantou na le machal be na apen ahi. Ajeh chu la

hin mi asuhal in chuleh tumging toh tho a houlam a la kimang cha hin nasa-tah a Sunday School kai chapang titah louva alen aneo abonin thanop na le kipana apen ahi. Agupna Sunday School Oja Numei ngengcheng kilheng hin boina(internal problem/disturbances/negligence)apen, hijeh a hi chapang hole oja kikah a kihoutheina(fair conversation/Gender inequalities) hi aha umtheipon ahi, Chuleh Numei ngengcheng music helou ding in chapang honboina lentah atoh in ahi. Tulai a numei bou kilhen na houbung a um in chapang hon nahsah lounale oja ho kichat na anei pouve. Numei bou kilhen da han lang chuleh pusal bou jong kilhen da han ahin, Pathen thun ase bang in thiljouse akiman chah na ding dol bang in Pusaljong, Numeijong kilhen hen. Sagina VBS ahiloule Chapang Sunday school Camp kiti ho hi achom beh a houbung in ahiloule Special Class Convention a konna ki gonpih ji le hin chapang hohin nasatah a aphatchompiva hiche hin sunday school lam nasatah a amachal be sah ding ahi. Agietna Convention hin a kumseh a Sunday School kai Beginners-Pilhing a ding hin Competitive Sunday School exam ahilou le Programme adang dang ho hin gong u han lang alen apat aneo chan gei in pan alah na thei ding lampangho kibol ji le hin Sunday school hin nasatah a khantou nale machal bena anei thei ding ahi. Akona Sunday School chapang ho ding a hin houbung tinna Pathen thu toh kilhon ding in laa sah ji kihil na class jong nei u han lang chuleh Sol-fa jong kihil thei han lang Music Staff Notation class ti ho jong lamkai cheng in hin gong u han lang hile phachom lleh ding ahi. Somna Music Track sep tei tei di ahi, ahin Sunday School kai tengle hin Live Performance hi kibolthei le phahlleh di ahi, adih in Sunday School Oja ho hin Live Music kiha che pi leh Sunday School sung a Khantou machal napen hidi ahi. Akichaina penin, Activities jat chom chom ho Seminar hin lang Workshop hijong le topic jat chom chom a konna hetna anei thei na dingva kibol pih ji le phapen ding ahi. Lhagao le tahsa leiset a kikhen thei lou bang a lhagao thu le Bible thu kihil na bang a hi, tahsa thu a Science and Technology, History, Polity, Cultural, Ethics, Economic, Social ho nasatah in focuses kipe han lang hile kati e. ajeh chu thiljouse hi Pathen thu lou a umlou khat chang aumpoi, Hijeh achu chapang hon hitobang Secular lama alungboi nau anei teng ule hitobang toh kisai a programme ahiloule seminar nikho khat achom beh a kigong thei le phadi ahi. Ajeh chu chapang ho hi competitive minded ahitauvin, hijeh a chu hiche ni tengle chun adoh nom nom adoh uva hitia achu alungboi nau seilhap pih a Secular/Science toh Chritianity/Bible ki relate dan le subject dang le science ho jouse chung a Pathen loupi na kilah dan ho vetsah a seipih ding ahi. Hiche hin Leiset a student jouse atohkhah soh kei ahi. secular lam in science theory apen hitichun adang dang in apen, ahin Thutah le Pathen loupi na apeh thei lou ahi. Hiche jeh a hi Convention in Sunday school ho aneo va pat pilhing changei a dia nikho khat akoi doh a hiche nia hi Science le Christianity thu le Pathen thu in thiljouse asem dan le mihem hungkonnale leiset kisep dan ho hi han, epi hijongle kihou na nikho a nei ding ahi. Hiche hin Sunday school kai chapang ho hetna secular lam hihan lang lhagao lam hijong le dindetna(firm foundation) anei diu chutengle chun suhling hoi hilou diu ahi. Sunday school a ding

a khantou nale macha na ding a athupi pen chu ahi. Students are the pillar of the future akitin ahin Sunday School student ho vang chu 'Pillar Ambassador for Christ in the future' hi diu ahi. Hiche hin nasatah a K.B.C. Convention le houbung ho a Sunday School khantou nale machal na apeh a, machal be na hiding ahi.

Achainan K.B.C Convention in Sunday School hi ahithe channa broad minded nanei tah a, ajo chan uva pan alah uva na atoh diu chu thupi ahi. Chuleh K.B.C houbung tinna umho jousen Sunday School hi nahsamo lou a phatah a taona toh tho a avetsui jing na ding a apan ngai yin ahi. Hijeh chun K.B.C houbung mipi jousen Convention hat na ding le damna ding a tao a khat le khat hat mo na kihu to ding ahi. Pathen in K.B.C phatthei boh han lang chuleh Sunday School khantou nale machal na pe jing jeng taken.

POETRY

Sunday School

Lhingboithem Teresa Lupho, Maphou Baptist Church, KBC Gb. No. 01

*Sunday School, Aw Sunday School
Chungmang Pathen thuhing kajildoh na,
Chuleh Pa-Pathen in chapang eiho eingalut u kahet chet na.*

*Sunday school, Aw Sunday School,
Loile pai ngaicheng ho toh,
Pathen thu lam a kakhan tou kamachal thei nao,
Chule loile gol ho toh kathem jil namun.*

*Sunday School, Aw Sunday school,
Pile pu, chunle jo thungai kajil namun,
Chuleh chonphat kisinsah na thilse kadalhah na,
Thilpha kajil doh najong Sunday School.*

*Sunday School, Aw Sunday School,
Chonchan pha, umchan pha,
Chule phatchomna dang dang kajil dohna,
Sunday School hi aphachomin agil ngeije.*

*Sunday School, Aw Sunday School,
Jilkung hon Jseu Christan eingailut nao
Thusim eiseipeh na mun-u,
Hunguvin loile golte ho Jesu Thusim seiphong leu hite.*

*Sunday school, Aw Sunday school,
Tonsot tonsot in Sunday School phatchomna hi,
Amin kija jing hen,
Chule amin kithang jing taken, Amen!*

LEADERSHIP AND ACCOUNTANCY SEMINAR

(KBC NO.11)



Pathen lungsetna jal leh puihoina jallin achesa nisim 23rd to 26th August, 2017 nikho sung in Gambirh Tohgong na noijah Leadership and Accountancy Seminar Centre Church, Sangaikot mun'a lolhingtah in ana kichaitan ahi.

Hiche Seminar a Resource person ho chu (i) Rev. S.Prim Vaiphei, President AMCO (ii) Pastor Letlal Haokip Gambirh Pastorh (iii) Pastor Tin-goulen Haokip C/C Sangaikot Devotional leader chuleh Pu Tongkhomang Programme Co-Ordinator lamkainan Thupi: "Nalhacha natcho chu bulhit molson" (II Tim.4:5) ti thupi mangchan ahung kikhom Gambirh lamkai hole Houbung lamkai mi 110 lung nachim in hilna anei uvin, lolhingtah in chai ahi. Achung cheh uva Gambirh in kipa thu seijoulou akiphongin Pathenin phatthei boh soh kei taohen. Chuleh tuchung hiche Seminar toh molsoa aumtheina dinga aneile agou, thale jung chule sumle pai, Amun le ajang hinphal peh C/C Sangaikot Houbungte chungga Pathenin phatthei boh soh kei taohen.

Gambirh No.11 Pathenin mapui jing taken.

Pu Hemthang Haokip
Chairman, KBC No.11

Pu Doujathang Haokip
Secretary, KBC No.11

KIPA THUPHON



KBC Gambih No. 7 sunga Houbung 18 lhina P. Bungsang Houbung tun doh ahitoh kilhonin, Nisim 15th May 2017 nin Pakai lhacha Rev Lamkeng Lhouvum Gambih Pastor kin Thempu hina in Hou in thah kisa chu Pa- Pathen Chapa Pathen chuleh Lhagao Theng Pathen minin, katdoh leh hon dohna akineitai.

Kipa umtah chu hiche Hou in sah na dinga hin KBC Office lam'a kona jong kithopina Rs.15.000/- (Fifteen Thousand) jong kithopina eipeuvin ahi. Pathen in KBC phat thei boh jing taken.

Pakaiya natoh khompiu,

Pu Mangminsei Haokip
Head Deacon, P. Bungsang Baptist

Pu Nohsei Haokip
Houbung Secretary, P. Bungsang Baptist Church.

Baptism kin KBC No. 7

Pathen lungset na jallin, achesa June leh July chuleh August 2017 lhasunga KBC No. 7 Houg mun chom chom'a khang thah ho tahasana tuilut akineipitan ahi. Pathen in khang thah ho Pakai ja dinga hung vah doh jing dingin phat thei boh jing tao hen.



1. Khoken Baptist Church.
2. Khoripok Baptist Church
3. New Kelthelmanbi Baptist Church.

Pakaija natoh khompiu,
Rev Lamkeng Lhouvum, Gambih Pastor.

Khoken Baptist Church Fasting Prayer



Achesa nikho 26th August 2017 chun Khoken Baptist Church KBC No. 7 Houbung miten houbung pumpi An ngol taona akimangin ahi. Hiche fasting prayer hi adeh a kho-sunga vangset naho achesa 5th May 2017 vgamnnoi mihon khosungas kon'a mithum akai mang uva, mini hung kithat le Pu Palal Haokip khomi khat kithas naho chungthu leh thil dcang ho jeh a kibol ahi.

Thupi:

"Eihon iche nao lamlah chengseo ve chenu hitin chuteng le Pakai henga kile kit taso hite" *Lamentation 3:40*.





SHALOM THEOLOGICAL SEMINARY

Kumseh a eipaova nivei ana kibol jing C.Th course a dingin admission akipan tai.

1. *Course min* : *Certificate of Theology (CTh)*
2. *Course simna pao* : *Eimi pao thengset*
3. *Amun* : *STS (Temporary Campus), Gamnom Sapormeina*
4. *Mess/Course/Hostel fee* : *Mi khat a Rs. 5000/-*
5. *Aphatsung* : *18 September (Monday)- October 18 (wednesday)*
6. *Koi in asimthei* : *Mi pengthah anom jouse*
7. *Lekha thepna ngaicha* : *Labu Bible kivet thei apat chunglam*
8. *Ipi pi kipoh ding* : *Labu, Bible, janpon, von, eima ngaichat cheng*
9. *Application Form hoi a kimu*: *KBC Office leh STS campus*
10. *Last Date itih* : *September 15, 2017*

Hetsah

1. In mun a kona kile a kainom hon mess fee leh hostel fee jaolou a course fee Rs.3000/- bou peh a simthei hiding ahi.

2. Thinglhang a um Office moh phah joulouho in Phone a Office hetsahna ahin manei uleh Office hetpehna dungjui a Application Form noia kivetsah bang a ahin kisem uva

September 18, 2017 teng ahin kipoh thei uva thil ijakai akisuhto thei ding u ahi.

3. Tuchunga hi mi 15 bou kila ding ahin, admission bol masa ho kilading, mi 15 alhin le adang kilah be thei talou ding ahi.

Thuchen dohbena ding:

Rev. Silas Jangminlen Haokip, Director, STS,

Phone No 8413960326

Email: shalomkbc2010@gmail.com



**Gambih 8 Pate anngol taokhomna Tuibong Centre Church munna
5th August 2017 a ana kinei na.**



**Songphel Baptist Church Gambih No 2 Revival
Programme, 18 - 20 Aug. 2017**

Post Regd. MNP/81
Regd No. 18134/88



KBC Gambh No. 11 Leadership & Accountancy Seminar



If undelivered, please return to
The Editor, KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173